

蜀蜀

難

敘

碧略



蜀 難 敘 略

沈 荀 蔚 述

叢書集成初編

(補印本)

蜀難敘略及其他一種

一九三九年十二月初版
一九五九年十月補印

商務印書館出版

上海虹口印刷廠印刷

蜀難敘略

沈華陽傳

內江范文英撰
四川南巡撫

公諱雲祚字子凌號岱來南直隸太倉州人崇禎丙子舉於鄉庚辰成進士授華陽令時羣寇縱橫久海內糜爛逆賊張獻忠屢出沒於楚蜀之交所在殘破揭竿而起者浸不可制公初釋褐萬里單舸溯江流摩賊壘遠令巖邑慨然有保障全蜀之志壬午四月甫視事卽以計擒誅狡賊秦纘勳等先是蜀有搖黃賊之禍秦纘勳者川東石砭土司秦良王之族也潛伏內地爲賊耳目已并其黨誘執之寘於獄夜半殺獄卒逸去吏請閉城大索公曰無張皇擾民無益也潛發書土司授以方略土司果擒賊至悉斷其手足指矣吏驚以爲神公曰吾策之審矣賊踰獄必以石砭爲逋逃藪秦夫人方以剿寇効節朝廷詎肯庇纘勳而墮功名乎於是立決殺之甲申正月獻逆破夔門而入蜀中大震公知事迫屢至蜀府請見欲爲王陳守禦之策不應而內江王雅信公公乃欲藉內江得之蜀往說內江曰人無愚智皆知賊勢披猖成都必及於禍今蜀府貨財山積不及今捐之募死士東向殺賊一旦豕突疆場軍民奔逸誰爲王守此府庫乎愚者斂財而府禍智者轉敗以爲功蜀中有險可憑有兵可戰特患無財可用誠不愛萬金之賞鼓勵行閒臣等身編行伍效死爭先上賴朝廷威靈猶可埽除寇亂保全家國不然拱手授賊無爲也且獨不見周楚之已事乎先闢逆圍大梁周王下令斬賊一級賞五十金賊以是不克而去獻逆破武昌閱楚府

私藏笑其有財而不知用。公以是激內江。內江心動。入爲蜀王言之。王內惜金錢。苟幸無事。以祖制辭。公見王府擁財不發。大吏握兵束手。一縣令子立危城。欲戰守而無虻蟬蟻子之卒。欲召募而無斗粟束芻之餉。張空拳上下叫號。而舉動掣肘。蓋至是而知事不可爲。不待城亡罵賊之日。已自分必死矣。三月。闖逆陷京師。先帝殉社稷。六月。獻逆破重慶。殺巡撫。乘破竹之勢。鼓行而西。所過無堅壘。縱火焚掠。數百里。煙焰屬天。漏刃餘民。扶老攜幼。號哭道路。西奔者。日夜不絕。是月。成都火器局。無故火發。燬廬舍。軍民死無算。人情益洶洶。疑肘腋皆賊。蜀藩始懼。悔用公言不早。甫出財佐召募。而賊已水陸薄城下矣。八月五日。御史劉公之渤。總兵劉公佳胤。乘城而守。總兵出戰。大敗奔還。賊乘勢急攻。三日。城陷。蜀王率其妃嬪。自沈於井。總兵走死浣花溪。公與劉御史。及理刑劉士斗。成都令吳繼善等。俱被執。幽於大慈寺。是時賊有衆百餘萬。據名都。雄視全蜀。謂天下不足定。將卽僞位。乃遣其黨。卽幽所饗諸文武。欲降之以備百官。而臨以白刃。賊固屬意諸大吏也。公奮然怒。從衆中躍而起。手擲案。大罵逆賊死萬段。指其口曰。有口食賊肉耳。豈食賊粟哉。公長軀雅度。至是氣憤盈。目光炯射。鬚髯戟張。揎袖指賊。罵聲響撼廊廡。出賊不意。相顧錯愕。奔告逆。遂殺公。時年四十有三。兩劉公亦同日死之。嗚呼。公自聞警以來。已決計於死。而今果死矣。當日法吏戎臣伏節而死者。相枕籍。舍生取義。豈獨難一縣令。然是日爲縣令而死者。獨有公。則公之死。又似不易也。夫人臣之義。未有陷賊而不死者。彼倖生者。何人歟。於是而知公爲得死所矣。余曾謁公於華陽。語及寇亂。歎息國論之失於操縱。坐使中原流離。益州天府。已殘燬不支。而文法煩密。雖有豪

傑欲自奮不能。國家事正未可知。萬里孤臣。死不知所。語次慷慨。余已爲公悲之。至是道路籍籍。果傳沈知縣獨死賊矣。乙酉十一月。義師復雅州。有反正參議郝孟旋道其事。而參將鄒振從賊中來。稔其死時狀。謂獻逆怒公。揮衆叢刃之。骨肉爲醢。始得其詳。聞公妻子尙有存者。余訪得之於九溪山。其戚張士偉以公之子來見。僅八齡。士偉爲余道挈公遺孥奔走流離。濱死而生。且述秦纘勳事。謂公臨事曉暢機宜。發策洞中窾要。使當日少用其言。不以繩墨束縛之。使得展布四體。先事辦賊。卽未能滅賊。必不至爲賊所破。縱大勢不可爲。亦當如巡遠百戰殺賊。少伸忠臣義士之氣。惜乎其未遂也。相與流涕久之。士偉江南奇士。有經濟才。余檄之權洪雅令。能畫策佐軍需。不乏無何死於職。未竟其用。至今惜之。

論曰。余次序華陽公事。而知守節死義之臣。天之所屬意。必有所以扶持於其間也。方賊之斬艾蜀民。搜牢仕宦。數千里埽地無迹。卽畏死而降者。往往齟齬不遺。而華陽之寡妻弱子。獨能脫其身於刀塗血道之中。雖提攜捍禦之有人。亦天之憫其忠而不忍使之無後也。天步方艱。尙闕褒揚贈卹之典。一旦皇路清彝。訪求死事孤忠。則公之食報於身後者。宜何如其俊偉乎。第恐其子語焉而不詳。士偉旣死而無所考。故傳其大節以授之。且名之曰世廕。以俟諸異日焉。

蜀難敘略

清 婁東沈荀蔚述

慨自潢池肆毒。薄海同仇。凡被兵之所。遠邇俱得其詳。惟西蜀僻在一隅。聲問阻絕。隄防隙而洪水滔天。棟宇焚而烽煙匝地。豈世運之難挽。實人事之不修也。荀蔚髫齡不造。遭此慘烈。歷年以來。亂靡有定。雖升沈代謝。世所恆有。而滄桑陵谷之狀。誠有曠古僅見者。乙未丙申閒。幸爲巴蜀河清之會。蔚亦稍能筆墨。因於帖括之暇。或追惟往事。或蒐集遺聞。期於可信。咸筆之於書。自茲以後。凡耳目所及。日附益之。始則國破家亡。旣而子身萬死。總目之曰蜀難敘略。埃難平則止。或出蜀亦止。蔚之願也。不幸戊戌正月十九日。方居母憂。而書燬於火。繼作之。至己亥二月初二日。值高承恩之難。復棄於兵。今甲辰二月十五日。歸帆東下。已達楚境。名曰新灘。又逢陽侯之怒。僅以身免。蜀難餘波。猶若是其酷也。後在襄陽署齋。永夏無事。復追憶而次序之。尙得十之五六。而西山餘孽。又適於是平。蜀難誠始終於西山矣。蔚萬里餘生。當此可勝慶忭。明年布颿無恙。得返故園。將挾是編以志終天之恨云。

崇禎十五年壬午春正月。荀蔚年五歲。隨先君子赴四川城都府華陽縣任。泝江而上。四月十六日。始至。時川西新經民變。獷悍如故。先君子力爲興利除害。年餘政聲始起。癸未冬。聞潼關失守。逆賊李自成據西安爲巢穴。將渡河。張獻忠尤狡黠。先已屢犯蜀地。熟悉險要。出入飄忽。及蹂躪湖南。遷延不入黔粵。先

君子遙度賊勢必復入川。屢請諸當事爲未雨綢繆之計。而皆苟安無事。先君子動多掣肘。惟拊膺太息而已。先是有搖黃賊震天王混天星搖天動黃龍等十三家。出沒於川東北山谷間者十餘年。殺掠人民無算。取少壯者文其面。作川王大王等字樣。以益其黨。漸至十餘萬。有秦繼勳者。川東石砭土司。秦良玉之族也。與華陽奸氏某等潛伏內地。每作搖黃耳目。故賊得乘虛肆其凶難。民無不欲食其肉者。後被擒。須報決。忽乘防範稍疏。與其黨數十人夜殺獄卒遁去。諸吏請曰。昏夜倉卒。賊必不及遠去。請大索城中。庶可獲。先君子曰。不然。賊非有外援不及此。必走歸石砭矣。吾聞石砭屢著戰功。今其女官秦夫人主事。尤稱忠順。我若遣汝等將之以重幣。鼓之以忠義。則不惟渠魁授首。而東方亦可免意外之變矣。乃遣能役數人。卽日東發。潛至其所。秦夫人果大喜。以大義滅親自任。將繼勳等如數擒出。斷其手足。嚴軍解至。且附文申請案院。圖寫全蜀形勢。請益兵分守十三隘。蓋土司屢請於巡撫陳公而不獲者。今欲藉先君之力而得之於巡按劉公也。劉公雖許。可柰無現兵。必須召募。而又乏餉。終成無米之炊。請於蜀藩。蜀藩不與。又不能專。必俟與撫議。而巡撫駐重慶。東西遼遠。文移往還。動須浹月。歲聿云莫矣。

順治元年。卽崇禎十七年甲申正月。獻逆悉衆犯蜀。守將秦夫人及參將曾英。趙榮貴。俱以守禦單弱。先後敗績。賊遂長驅而上。三月。成都戒嚴。先君子求見蜀王。不得。內江王知之。以先君子策內言於蜀王。王終以祖制爲辭。不能用。五月。聞李逆陷燕都。而川東斷臂。難民紛紛逃入省城。一時人情洶懼。不知所爲。蜀王始出財佐軍。然已無及矣。衆議蜀王監國。御史劉之渤堅持不可。躍入荷池。議乃寢。初巡撫陳士奇。

提學政。好談兵。故朝議卽命撫蜀。及撫蜀。又以詩文爲事。軍政皆廢弛。故賊得成破竹之勢。屯於忠州之葫蘆壩四十餘日。復左步右騎。翼舟而上。六月。曾英守涪州水路。趙榮貴守梁山陸路。俱敗而逃。賊遂奪佛圖關。以火攻陷重慶府。大殺次日。悉斷民右手。以瑞王及關南道陳勳。瑞王本封漢中以國破奔重慶陳勳及隴右士大夫多掣是皆不免。巡撫陳士奇知府王行儉。巴縣令王錫等。縛於教場。將殺之。忽雷雨晦冥。逆向天詬曰。我殺人與天何涉。以大礮向天叢擊之。俄而晴霽。遂皆遇害。七月。逆留賊將劉廷舉守重慶。已率衆西上。成都大震。內江王以先君子言皆驗。出私財益召募一千八百餘人。隸總兵劉佳胤標下。然皆訓練不素。而火器局復自焚。城中一無所恃。先君子自分必死。與原知太倉州事理刑劉士斗。成都縣令吳繼善。及諸寮屬。日相勉以忠義。曰。事至此。我輩之存亡。視此城矣。他非所知也。時有邛州舉人劉墨仙。與成都令善。爲謀遺種計。吳眷乃約同舅氏張叔度。攜先母及蔚兄妹。於七月十四夜出南門。由雙流新津入臨邛城。暫住八月初五日。賊薄成都。劉總兵出戰而敗。賊遂穴城下。實以火藥。又取大木長數丈者。刳之。兩兩相合。纏以繒帛。亦貯藥向城樓。城上望之益懼。復勵衆擊賊。賊卻二三里。衆皆喜。以爲將去也。初九日。黎明火發。而北角樓陷。木石如飛鳥。蔽天者久之。守陴者皆走。賊遂入城。蜀王率宮眷投於井。劉總兵赴水死。各院司道府及諸文武官俱被執。十一日。盡驅城內軍民男女於中園。將盡屠之。俄有龍尾下垂。逆以爲瑞。遂免死。仍逼入城。先君子被幽於大慈寺。逆遣其黨饋食。以厚祿相誘。更以天命爲詞。先君子擊案罵曰。吾豈食賊粟哉。自兵敗時。已不食。求死不死。何不速殺吾。將助國滅汝等也。賊黨知不可屈。往報逆。逆大怒。

先君子遂與御史理刑兩劉公同遇害。初御史及崇慶州知州王勵精皆與逆同里。人初疑之。至是勵精聞省城陷。卽朝服望北闕拜。坐樓上舉火自焚。勵精嘗於壁上書文文山孔曰成仁等語。後二十餘年。壁字猶如故。及州民建祠奉公像。甫祭畢而壁適頽。其精誠所積如此。逆初猶稱李自成永昌僞號。至是踞蜀王宮殿。僭僞位。國號大西。改元大順。以成都爲西京。自爲聖諭四言勒之石。設僞宰相以下各府部內外文武官。以汪兆麟爲僞相。兆麟桐城諸生。從賊已久。殘忍狡獪。知逆好殺。每先事承迎之以固寵。又以綿州嚴錫命充僞吏部。彭縣令湖廣王國麟充僞戶部。彭縣龔完敬充僞兵部。某縣令某充僞禮部。而僞工部者王其姓。與逆同起延安弓工也。癸巳歲有滇人楊經由白鹽井提舉陞四川洪雅令。原籍太倉。蔚尙書者也。余非其力不及此。王與張同里。以製弓良。故西京嘗見其遣人歸滇。有稟啓自稱沐恩下吏。問之。楊曰。此余恩上王時爲大司空。然爲人甚慝。不識文字。名某字某。蔚今不憶矣。其孫可望劉文秀李定國艾能奇四人者。逆假子。皆從張姓。爲將軍監軍先鋒等官。主兵柄。兆麟主機務。王尙禮馬元利馮雙禮張虎等爲僞都督。又配知府以遊擊。知州以都僉。知縣以守備。皆以僞科所取文武進士舉人爲之。以東門外中園作教場。南門外萬里橋爲屠戮之所。省城內外通衢房屋皆自前簷截去七八尺。兩旁取土覆道上。以利馳驅。城門出入必有符驗。登號甘結。犯則坐死者甚衆。入城者面上猶加印記。若失之則不得出。其後惟聽入而禁出矣。又凡衝僻閭巷有人之所。卽分發訶事之賊。謂之查事人。房屋垣扉皆遍如兩三偶語。或夜中燈火及夫妻子女語言閒。有稍涉不吉。若未平不穩斷絕死敗之類。次日併左右隣里十家皆斬之。死者初不知爲何事也。其有不及報而爲他處發覺者。則併查事人亦誅之。其殘暴類如此。時蔚母子居邛州。十一

日。邛州諸生聞省城失守。卽糾集無賴。向上南巡道胡恆伐鼓大譟。索印款賊。恆不與。時兼理建昌備兵事。挈家將南走。建昌城中鼎沸。蔚母子亦倉皇同奔。抵雅州河畔。見衛送胡恆。峨邊蠻兵數十人奔回曰。胡道家已爲王知州所執。將解省。慎勿渡也。乃於就近桐子林地方暫寓。王知州者。名國臣。本秦人。久通賊。恆廉得其故。嘗齟齬之。故國臣切齒。將甘心焉。又值國臣欲併將蔚家解賊。幸藉浙人錢州目經營得免。時有雅州生員傅原脩。密說天全土司高躋泰。於二十四日出兵擊國臣。國臣遁入成都。躋泰遂迎恆家入其地。然州民俱散走。蔚亦踉蹌同奔至孔家坪數日。道路之口。已紛然傳先君子與兩劉公同殉節矣。蔚母子聞之。雖痛徹心髓。而不敢發哀成服。又勢不可與吳眷同居。遂告別。由思經山至洪雅縣地方。止戈街暫居。以地名佳也。旬餘。忽一日清晨。見西岸中保壩。悉成戈戟叢。而地下無衣死人數千。且衣朱碧者已紛紛渡河。方知賊已乘夜襲殺居民。人皆膽裂。不識何以竟無人馬聲也。賊旋下令曰。凡爾處市鎮俱順民。毋恐。家給大順錢綴於首。可不死。而山中作逆者當剿除之。人是不敢入山。然搜求仕宦尤爲殘酷。濱於死者。日以數計。數日後。賊赴雅州。始得轉徙八面山下。然從此山中亦不可居矣。時有詔起原大學士王應熊爲督師。專辦蜀寇。應熊重慶人。駐綦江。達州兵備馬乾擊賊將走之。復重慶府。乾雲南人。初衆議請代士奇撫蜀者。九月。李自成遣賊將馬科至綿州。獻逆使孫可望與戰。爲所敗。自往擊之。科乃遁歸漢中。逆使李定國等追之。遂取保寧龍安二府。可望又取茂州。未幾。松潘副總兵朱化龍合同知詹天顏擊斬賊將王運行。遂復龍安。又復茂州。時逆以王國臣爲茶馬御史。與艾能奇率賊數萬至雅州。

飛仙關脅土司獻胡恆及避亂宗室朱奉鐔等數人。又取躋泰之弟登泰。詭云授以官。乃還至成都。皆殺之。後乘土司無備。突入始陽。土軍俱散。匿賊無所得。三日後。土軍大集。賊倉卒退回。土軍蹙之於河。死者千餘人。十月。逆令各郡縣起送王府宗室暨家口數萬人。皆殺之。惟富順之鎮國將軍平棚。蜀王弟子也。閒道走榮經縣。而建昌守將丁如龍。周雙喬。李鳳。越嶲指揮王自明等。初被胡恆檄。引兵亦至。知恆已被害。乃與黎州千戶馬雲龍。土官馬京等。率七姓蠻兵。謀擊賊。劉總兵之入援也。標下參將黎州曹勳。嘉定楊展從之。城破。俱執於南門外。將殺之。會日暮。繫解。俱投水得免。時勳逃至榮經。衆喜。遂共推爲帥。於是內江原戶部主事范文茝。邛州舉人劉道貞。蘆山程翔鳳。生員傅原脩。洪其仁。與勳等同奉鎮國爲盟主。稱蜀王。圖興復。共拜勳爲副總兵。統諸將。文茝爲監軍。道貞爲兵部職方司。翔鳳爲監紀官。勳率諸將敗賊於雅州龍鶴山。追至城下。反爲所敗。遂失榮經。退守小關山。楊展之得脫也。至新津。得鎮標潰卒千餘人。遂奉爲將。展令其衆由閒道趨敘府。而已至嘉定。取家口來會。及歸。而嘉定與諸屬邑俱降賊。改爲府。設僞官守之。展與其子璟新走敘府。未幾城陷。展遂奔蘆衛。又謁應熊於遵義。應熊授以故職。旋加副總兵。十一月。逆令搜求仕宦及起送衛所世職。皆殺之。又案籍誅其妻孥。無得免者。而僧道醫卜陰陽諸流。及百工技藝人。或託言齋醮。或考試。或興大工之類。至則皆死而拏戮之。法亦如之。又拘紳袍富室大賈。罰餉銀皆以萬計。少亦數千。不問其力之足否。事甫畢。則又戮之如初。或有訐訟干連公事。齎解之類。至則不問何事。并解役亦無歸理。又於田里起征戍之兵。而排門徵運糧人夫。乘有事漢中也。初李定國

等追馬科既取川北至是進攻漢中不能克而科又與賀珍合兵來戰定國等望見悉棄資仗奔還而諸兵夫竝未至漢中然竟無一歸者時蜀地自遵義而外皆爲賊有逆乃僭用郊見之禮以祝文表牋有黏接處遂怒其僞禮部某全家皆死謂不欲其一統也旋又以不葺治衙署殺其僞兵部龔完敬凡內外各僞文武官偶有小過輒斬之重則剝皮實以藁而衣冠之或剛則刀數以千百計若大杖乃用百十之數而笞之則亦以千計班聯中未有不失其故步者然又萬無逃脫之術寧非噬臍無及乎每有報某官闔門自盡者於是本官衙役及查事人與附近居民皆坐死

二年乙酉正月逆以蜀民多阻險自固益恨之令閉諸郡邑城門悉行斬戮人皆惴惴待死投繯赴井者無算旋傳僞詔赦之逆殘暴日甚人知必死凡有險阻皆舉義旗然亦有附名起義者雖云殺賊其實志在財物如上南則惟洪雅山深故爲尤甚動稱黎州蠻兵蔚自去冬入山至今春三月被掠者三次衣物一空且動以居民從賊爲言而賊至則又以爲叛地後蔚匿於寨中又爲土兵所得以語言不達渠等反認爲賊宦眷屬帶入九溪渡鐵鎖橋見其主將黎神武備述殉難之由幸彼方以義師爲名正欲培養忠義之後以服衆遂安插於小尖山西縉寺稍饋資糧度日於時雖有山谿之固苟延殘喘而孤蹤天末愈復無聊然亦無可如何也時聞副總兵曾英初與川東道劉麟長次碁江至是入援重慶大破賊馬乾之復重慶也賊將劉廷舉遁歸請救於獻逆逆命劉文秀統賊數萬東下置老營於合州之多功城三月至重慶水陸夾攻英乃遣部將于大海李占春張天相等分禦水陸而已率精騎數百從閒道襲破賊營取

其旗幟還與大海等夾擊。大破之。賊得免者僅三千餘人。英威聲大振。一時卒起之將皆歸之。至二十餘萬。且多舟楫。福王知其功。故以平寇伯加之。而楊展亦復敘府。春夏之交。賊將馮雙禮每戰輒敗。及孫可望來援。展乃敗奔江津。又聞逆發。賊數萬迎戰。朱化龍蔡僉事於羊子嶺大敗。化龍乘賊行列未定。遽以三寨番騎數百衝之。賊見卽驚潰。死者山谷皆滿。其得免者十纔二三。化龍以孤軍不敢窮追。乃還守舊地。蔚居山中。見黎神武等所爲殘忍妄誕。凡有俘獲及挾仇相害者。但云從賊。無不手刃之。又服飾不經。或戎服以白繒纏首。或紗帽補服。文武九品互用。或取神廟金色幘頭及龍袍著之。而其下參遊都守。則尤不倫。有衣冠璀璨者。有短褐檻褸類乞丐者。每朔望則雜沓而至。事已則器仗之屬悉以父兄子姪及隣里輩持之。須臾已沾體塗足。同作農事矣。此閒晴期甚鮮。盛夏不扇。雨夜則附火挾纊。秋見霰雪。時蔚已八歲。覓書不得。得敗甲一領。舅氏日取其中殘編綴而課之。九月逆詭以秋選科試之法誘殺進士舉人貢監生員及家屬合數萬。又開特科。死者復萬七千餘人。時文廟自火。逆曰。孔聖人不喜我殺其弟子邪。兆麟曰。四川文運已絕。故也是月。神武率衆三千餘人同黎州漢土兵將與賊將艾能奇戰於雅州。敗還。十一月。僞上南道綿州郝孟旋反正。孟旋見賊所爲欲歸明朝未得。而范文英程翔鳳知之。自小關山遣人招以書。孟旋遂襲殺守雅州賊卒。復稱明朝正朔。而以城付文英。自命其衆曰匡正營。往攻印州。不克。遂入洪雅之花溪山。後爲團練參將熊振生所殺。時逆決欲盡屠蜀民。乃僞下除城盡勦之令。云凡居山野者俱叛逆。將悉行勦滅。城內者俱良民。乃免死。於是深山窮谷之人咸扶老挈幼入城市露處。猶不

能容賊乃閉城。禁出者而悉衆入山野搜捕。掩殺嬰孩。無得免者。每賊日須首級。或二三。或四五。多寡以地方大小繁簡論。如式乃已。不則亦殺之。後利其輕。代以手鼻。其數亦如之。死者數千萬。骨肉之山。纍纍相望。又令賊卒凡子女玉帛。及一應貴重之物。不得輒留。犯者死人。畜以刀劍而諸物可焚者。則以火。惟金銀必以水土沈埋之。旣而城中屠殺焚燬。一如前法。且墮其雉堞焉。

三年丙戌正月。賊各屯戍俱撤回。併撤其僞文武官。僞官知不免。於是相繼反正。洪雅僞守備潘璘。乘義旅臨城。亦欲降。謀於僞令嚴廣。廣不可。欲執之。璘走得免。遂啓城潛納外兵。斬廣首。赴雅州獻馘。蔚於范公所見之。先是上年十一月。黎神武率衆從范公入雅州。聞公訪求故宦。神武言之。公由是知蔚。及故峨眉劉令在九溪。卽撥夫馬迎至楠木坪暫居。與公眷屬密邇。蔚卽同舅氏赴雅州請見。始知公爲先君子故人。公以洪雅需令。遂檄舅氏仍以經歷職銜署縣事。留蔚十餘日。慰勉備至。而屬望甚深。且以子相視。名曰世廕。示應卹廕也。仍檄標下參將熊振生送至乾垣陽。且就近供億。而舅氏赴任。是時民已屠盡。逆惡貫亦盈。怨鬼俱出而擲揄之矣。一日逆聞後廊下有奏樂聲。甚嘹唳。逆拔刀將殺之。見無頭女子數十人共案樂器。逆驚仆久之方甦。又一日。逆獨坐飲食。空中忽下數千百手奪之。又城中每日入卽聞言語及號哭聲。就視之則無所見也。而賊卒每出夜巡。卽有瓦礫叢擊之。至不敢出。逆惡其不祥。移出於中國屯之名爲御營。中有浮圖。逆命礮墮之。賊中磚石死者數千人。二月。逆夜縱騎登高遠望。見時有火光及聞人畜聲。逆怒其衆屠之不力。誅其主者。遂遣賊守其奔逸之路。搜牢一空。無或免者。逆嘗向天詛云。人

民甚多且狡。若吾力所不及。願天大降災殃。滅其種類。又每於隨身夾袋中。取書冊方二三寸許。屏人檢閱。然逆初不識文字。不知何故。賊自出屯以後。日惟焚燬城內外民居。及各府署寺觀。火連月不絕。惟蜀府數殿。累日不能焚。後以諸發火具充實之。乃就燼。其宮牆甚堅。欲壞之。工力與砌築等。不能待而止。又獲人牛各數千。負耒耜驅之。散行田野閒。遇禾稼則耕殺之。其所聚金銀。以千餘人運之。江干三月始畢。至是測江水淺處。多支流以殺其勢。一如築決河法。水涸於江底作大穴。投以金銀。而殺運夫於上。後覆以土。仍決江流復故道。後續有所得。俱刳木成鞘。運至新津江口。載以千餘艘。將爲順流計。至巫峽投之。時賊久聚成都。除川西平原。皆成空地。其餘皆建義旗。楊展已於春閒。泝流取上下南之地。屯嘉定州。與黎雅之曹勳等聯絡相應。威茂之朱化龍。與龍安之詹天顏。曹洪等在西北。而曾英馬乾屯重慶。譚文等屯忠州萬縣。王祥屯遵義。督師幕府在焉。此東方也。綦布星列。遙爲聲援。賊勢日蹙。惟川北之保寧順慶二府。尙有賊將劉進忠守之。進忠知逆無成。已率衆至忠州。欲與曾英合。已而自疑。復引還。逆欲殺之。未得。七月。逆以川北民未盡屠。且欲誘殺進忠。乃燒其財貨舟楫於新津。拔營而北。所至留數日。焚戮如川西法。赤地乃已。九月。入順慶府屠之。屢檄進忠不至。逆自言是歲吾有大劫不利。欲獨入武當山修行。俟劫運已過。復當橫行天下。乃營於西充縣之鳳凰山。大治舟楫。將復走楚。船成不以入水。而使賊衆舁至下流。若船重不能舉。及舉而道遠少休者。皆殺之。是時已無民可逞。乃自戮其卒。日一二萬人。初殺蜀卒。蜀盡。次則楚。楚盡。乃殺其同起之秦人。後無以爲罪。乃量之以度。過與不及者皆死。至西充時。尙一百三

十萬兩月餘。宰割過半矣。時本朝大兵至漢中。進忠已潛遣吳之茂等迎降。久之未至。進忠又恐爲逆所襲。乃自迎肅王於百丈驛。進忠前導至保寧。水火遺民。迎拜鼓舞。大兵不宿而過。次早。賊瞭望者往報逆。逆曰。妄耳。寧有北兵能達此乎。斬之。如是者三。逆亦自疑。乘馬登高望之。卒遇前鋒一矢而殪。賊衆不戰而潰。大兵追殺二里。賊死及降者三十餘萬。及昇逆至。猶張目瞪視。於是斬首剖心。心色純黑。時十二月十一日也。獻逆稔惡滔天。古今寡儔。大兵誕將天威。爲天下復讐。神人共快。昔童謠有生於燕子嶺。死在鳳凰山。不謂逆應之。及傳首成都。遺民競取其首。提擲刺割。踐踏污穢。無所不至。雖大快心。實恨其死之太易。聞埋尸處。叢草如棘。觸之者皮肉糜爛。又時有黑虎噬人。人皆遠之。戾氣所鍾。死而不磨如此。大兵之南下也。趙榮貴以龍安降於肅王。王於是使固山檀太追賊黨。而使榮貴入成都。先是賊遁月餘。楊展、曹勳等偵得之。於九月入成都。報恢復。逆之焚舟北走也。一舟子得免。至是詣展告之。展令以長槍羣探於江中。遇木輒則釘而出之。周列營外數日。已高與城等。如是年餘。時展等聞榮貴將至。議以成都難守。各引兵歸。及榮貴至成都。見千里無煙。無所設施。亦還龍安。獻逆之被誅也。孫可望等率餘黨東奔至重慶。出曾英不意。英戰敗溺死。其將李占春于大海。率水軍奔涪州。餘衆奔遵義。從王祥。可望等遂由遵義奔雲南。汪兆麟初散走。至是追及賊黨於烏江。可望等問何所師法。兆麟對以不須遠學古人。但當以老萬歲爲法。蓋指獻逆也。可望大怒曰。蜀地富饒險固。古來英雄所必爭。我輩血戰垂二十年始得之。自謂已成王霸之業。汝乃朝夕蠱惑。致萬萬生靈皆盡於鋒鏑。今已置身無地。尙復誰法邪。恨汝一身不足